

CUSSEGL GROND

Sessiun d'avust 2022

Incumbensa Michael (Donat) concernent l'applicaziun da la clausula generala da polizia per allontanar il triep dal Beverin sco er tut ils lufs che han in cumportament problematic e che impedeschan ina coesistenza

Tenor las infurmaziuns da l'Uffizi da chatscha e pestga (UCP) dals 24-08-2022 èn las suandantas stgarpadas d'animals da niz d'attribuir al triep dal Beverin, malgrà che las muntaneras eran protegidas:

- 2019: 32 nursas, 16 chauras, 29 ulteriuras nursas sparidas
- 2020: 43 nursas stgarpadas sin la Stutzalp, 1 asen mort, 1 vadè mort
- 2021: 28 nursas mortas, 3 asens blessads, 5 bovids blessads e 2 bovids morts
- 2022: 2 vatgas-mamma, 3 attatgas sin arments (senza blessuras), 5 nursas blessadas e 69 nursas mortas

Ultra da las stgarpadas d'animals da niz hai dà ils suandants inscunters problematics cun umans:

- 25-03-21: Il luf è restà per pli ditg en la vischinanza directa dal vitg da Nufenen ed ha pudì vegnir stgatschà mo, perquai ch'il guardiaselvaschina ha dà in culp d'avertiment.
- 11-08-21 e 17-08-21, Alp digl Oberst: Inscunter cun ina pastura. Tar l'emprim inscunter han ils lufs mussà in cumportament da smanatscha. Tar il segund inscunter han els empruvà da tschiffar il chaun pastur.
- 27-08-21: Inscunter a curta distanza tranter dus turists ed il triep da lufs durant ina spassegiada a la Alperschällilucka. Quatter dals lufs giuvens han apparentamain pudì vegnir stgatschads pir suenter pliras emprovas.
- 22-09-21: Inscunter tranter in chatschader e plirs lufs a Spleia. Ils lufs èn suandads il chatschader a curta distanza durant pliras minutas. Il di suenter hai dà in nov inscunter.
- 03-01-22: Inscunter a Dumagns tranter viandants ed in luf ch'è sa trategnì per pli ditg en la vischinanza d'umans e che n'è betg sa laschà stgatschar. Suenter è il luf s'allontanà mo plaunet.

Sin basa da la Lescha e da l'Ordinaziun federala da chatscha ha la surveglianza da chatscha sajettà l'onn 2019 quatter lufs giuvens, l'onn 2021 trais lufs giuvens e l'onn 2022 dus lufs giuvens da quest triep. Supplementarmain han gi lieu differentas accziuns da spaventar ils lufs. Las mesiras prendidas, sco las spaventadas u las sajettadas da lufs giuvens, n'han betg mussà l'effect giavischà e n'èn betg chapaivlas per las personas pertutgadas.

Ils problems cun ils lufs s'augmentan en tut il chantun. En spezial en il Partenz, en l'Engiadina Bassa, en la Surselva ed en il Mesauc n'è la coesistenza tranter il luf e la cultivaziun dal territori da muntogna betg pli dada. Quai da maniera sumeglianta sco en la regiun Viamala. Causa las grondas suffrientschas per il muvel da niz na vegnan las alps betg pli chargiadas u vegnan stgargiadas pli baud pervia da la preschientscha dal luf. Sche las alps na vegnan betg pli chargiadas, è quai ina perdita da proprietad. Plinavant han bleras puras e bleras purs sco er ina gronda part dal persunal d'alp problems psichics pervia da la preschientscha dal luf e pervia da las consequenzas da tala. Uschia èn differents bains giuridics, sco il corp, la vita, la sanadad u la proprietad, periclitads e per part gia pers. Las pussaivladads da la legislaziun vertenta da proteger ils bains che dovran protecziun èn inefficazias (guardar exempel dal triep dal Beverin). Sch'i manca ina basa giuridica per proteger ils bains che dovran protecziun, pon ins recurrer a la clausula generala da polizia.

Al fatg che bains che dovran protecziun van a perder pervia da lufs cun in cumportament problematic, stoi vegnir fatg frunt cun tut ils meds existents. Perquai pretendan las sutsegnadras ed ils sutsegnaders da la Regenza ch'ils suandants lufs en il chantun Grischun vegnian allontanads sin basa da la clausula generala da polizia:

- a. l'entir triep dal Beverin,
- b. tut ils auters lufs che han in cumportament problematic e che impedeschan ina coesistenza.

Cuira, ils 3 da settember 2022

Michael (Donat), Roffler, Loi, Altmann, Bachmann, Bavier, Beeli, Bergamin, Berther, Bettinaglio, Binkert, Bleuler-Jenny, Brandenburger, Brunold, Bundi, Butzerin, Cahenzli (Trin Mulin), Candrian, Collenberg, Cortesi, Crameri (Surava), Danuser (Cazas), Della Cà, Derungs, Dürler, Epp, Favre Accola, Föhn, Furger, Gansner, Gort, Grass, Hartmann, Hefti, Heini, Hohl, Holzinger-Loretz, Hug, Kasper, Kienz, Koch, Kocher, Kohler, Krättli, Lamprecht, Lehner, Loepfe, Maissen, Mani, Menghini-Inauen, Messmer-Blumer, Metzger, Michael (Castasegna), Mittner, Morf, Natter, Rauch, Righetti, Rüegg, Salis, Sax, Schutz, Sgier, Spagnolatti, Stocker, Tanner, Tomaschett, Ulber, Weber, Widmer, Wieland, Zanetti (Sent), Zanetti (Landquart)